

VOILA⁷¹A

s'Cliqueheftli vo de Basler Rolli



© Benno Hunziker

Mai 2023

Basler Rolli Jungi Garde & Stamm TERMINKALÄNDER

Wenn	Was	Wär
DO 29.06.2023	GV	Stamm
DO-SA 13.-22.7.2023	Basel Tattoo	Stamm, AG
DO 17.08.2023	Grillplausch	Stamm, AG, JG
SA-SO 28.-29.10.2023	JG Weekend	JG
DO 21.12.2023	Wiehnachtsässe	Stamm
DO-SA 11.-13.1.2023	Offiziells	Stamm, JG
SA 27.01.2024	Yebigsdaag Drummeli	Stamm
SA-FR 3.-9.2.2024	Drummeli	Stamm
MO-MI 19.-21.2.2024	Fasnacht	Stamm, AG, JG
SO 3.3.2024	Bummel	Stamm
SO 10.3.2024	Bummel	AG, JG
DO 14.3.2024	Lämpesitzig	Stamm
SA 25.05.2024 (provisorisch)	Bunte Oobe	Stamm, AG, JG

Die aktuelle Termin vo dr Alte Garde wärde über's Internet mitteilt



LILLY MATTEO Y UN A VALENTIN NORA
SWISS MEGA PARGG LIAN PETER
MAEL LINUS AMELIE ALAIN
FASNACHT HANNAH JORIN THEODOR WUNDERLAMP
ANNABELLE TIM CHARIVARI LASSE LILJA
DAARTE LILJA
LAURIN ALEA NIKKA BOULE
LAAFERI BENE FLURIN
GIAN ALINA
BUMMEL
FASNACHTSBÄNDELI

Liebi Rolli

Währenddäm ich vor däm Täggscht sitz, warte mr leider immer no druff, dass d Temperature ändlig bitz wärmer wärde und dr Friehlig richtig Fahrt uffnimmt. Y hoff aber, dass jetz wo ihr s neue Voilà diend lääse, s summerlige Wätter ändlig do isch. In däm Sinn möcht ich euch allne e sunnige Gruess schigge und euch ermuetige, s Lääbe in volle Züüg z gniesse!

In de letschte acht Joor isch mir s Privileg zuegstande, unsere Verein als Obama dörfe z fiehre. Das Amt het mi mit dr ganze Verantwortig immer mit Stolz erfüllt und ich bi froh, dass ich sit viile Joor darf e Däil vo de Basler Rolli z sy.

Dangg em Ysatz vor euch allne darf unsere Verein mit ere grosse Junge Garde, eme aktive Stammverein und ere vitale Alte Garde optimistisch in d Zuekunft luege. Y bi doorum gspannt, was s Fasnachtsjoor 2023/2024 alles für tolli Erläbnis für unsere Verein z biete het.

Löönd uns dä Summer gniesse, zämme Spass ha und gegesitig unterstütze. Ob mir an musikalische Ziil dörfe schaffe, neuI Idee entwiggle oder äifach zämme d Zit gniesse - y freu mi uff die gmäinsam Rolli-Zit.

In däm Sinn,
uff e tolls Cliquejoor!

Dominic
Obmaa Stamm



s Voilà Team

Inhalt Stamm, Dätschmaischtere, Vrsand: **Nadine Nickler**

Mitässer & kreativi Mitdängger: **Andrea Häner-Roth, Lara Petralli**

Inhalt Jungi Garde: **Michèle Emmenegger**

Inhalt Alti Garde: **Aernscht Heitz**

Adrässänderige: **baslerrolli@gmail.com**

Redaktionsschluss Voilà Nr. 72: ???

Druggerei: **Reproline GmbH**

Titelsyte: **Rolli @ Charivari 2023**

<http://www.baslerrolli.ch/>



by uns findsch alles
wo's bruucht
zem feyn kenne ruesse

Aluminiumdrummlle
Messingdrummlle
Holzdrummlle
Schlegel
Bandalier etc.

Allschwilerstrasse 34
4055 Basel
061 271 79 19
www.trommelbau.ch

Büchler
Trommelbau
Basel



HERZLICH WILLKOMMEN



Maëlle Stöcklin
20.04.2023



Ich heiss **Lilja Kuhn**, bi **15** Jahr alt und due bi de Rolli **Piccolo** spiele.

• Worum bisch bi de Rolli? **Will ich s Zwüschemenschliche und s Musiggkalische schön gfunde han**

• Was hättsch gärn an dr Fasnacht zum z'Nacht? **Isch mr eigendlich glyych**

• Welles Gosdym hättsch emol gärn an dr Fasnacht? **En Ueli**

• Was für Hobbies hesch no näbscht de Rolli? **Pfadi**

• Was möcht ich an däre Stell no gärn sage? **Ich freu mi jetzt scho uf die neggscht Fasnacht**



Ich heiss **Laurin Nägelin** und bi **12** Jahr alt

• Was machsch bi de Rolli? **Ich möcht gärn pfyffe lerne und bi de Basler Rolli Fasnacht mache, Spass ha und neuu Mensche kenne lerne**

• Worum bisch bi de Rolli? **Will ich d Irina und Alea kenn**

• Was hättsch gärn an dr Fasnacht zum z'Nacht? **Am liebschte äss ich Pizza**

• Welles Gosdym hättsch emol gärn an dr Fasnacht? **En Ueli**

• Was für Hobbies hesch no näbscht de Rolli? **Ich spiel Handball bi dr U13 in Muttenz, spiel Schlagzüg und ich bi gärn dusse mit mine Fründe**

• Was möcht ich an däre Stell no gärn sage? **Ich freu mi sehr, dass ich bi de Rolli afangen ka und ich hoff, dass ich vieli Fründe find**

Nochwuggs / Die neue Pfyffer:inne bi de Junge Rolli



v.l.n.r.: hinteri Raaie: **Hailey Plunkett, Alain Studer, Yuna Delay**
voderi Raaie: **Valerie Dobrovlnà, Linus Birchmeier, Ashley Plunkett**



v.l.n.r.: hinteri Raaie: **Alina Martin, Hannah Wenk, Annabelle Evard**
voderi Raaie: **Alea Sprecher, Amelie Käser, Nika Schneider**

- Worum sind ihr bi de Rolli? **Wäge dr Familie und/oder Fründe und zum leere pyffe.**
- Was hättet ihr gärn an dr Fasnacht zum z'Nacht? **Gärn ässe mr Kääswaaie, Mählsuppe, Ziibelewaaie, Spaghetti, Sushi und vorallem Hotdog!**
- Und welles Goschdym hättet ihr gärn an dr Fasnacht? **Mr wünsche uns vyl Rolli Katze, Bajass, Waggis, Ueli und alli Tier usem Zolli!**

Nochwuggs / Neui Drummler:inne bi de Junge



Tim Käser und Lian Dreyfus

	Worum bisch bi de Rolli?	Was hättisch gärn an dr Fasnacht zum z'Nacht?	Welles Gosdym hättisch emol gärn an dr Fasnacht?	Was willsch sunscht no sage?
Tim Käser	Will ich in e tolli Clique ha wölle und scho paar kennt ha	Chickennuggets mit Pommes mit Ketchup und Mayo	Blätzlipajas	Ich hoff, dass ich mol e ganz guete Tambour wird
Lian Dreyfus	Well ich will drummler lerne	Sunnereedli	Ueli	-



v.l.n.r.: Lasse Siegrist, Gian Roberty, Valentin Bischof, Matteo Logo, Theodor Ehrenbold, Flurin Fischer, Mael Gysin, Ben Hartmann

Nochwuggs / E Hampfle Jungi stellt sich vor

	Worum bisch bi de Rolli?	Was hättisch gärn an dr Fasnacht zum z'Nacht?	Welles Gosdym hättisch emol gärn an dr Fasnacht?	Was willsch sunscht no sage?
Lasse Siegrist	Damit ich mitm Mami und Gotti ka Fasnacht mache.	Pasta	Waggis	Y finds toll dörfe z drummle
Gian Roberty	Wäge minere tolle Kindsgilehererin (Eveline Siegrist). Si weiss, dassi so gärn würd trummle und het mi mit mim Fründ Theodor ins Probetrummle gschigggt.	Isch egal, i ha alles gärn wo's an dr Fasnacht git usser Ziebelewaie - Hauptsach an dr Fasnacht si!	Hmmmm, kei Ahnig, eifach e tolls Goschdüm wie zum Bischpil e liebe Ueli oder e schöne Waggis 😊 oder au e coole Blätzli-bajass...	ich finds mega cool, dass i jetzt au drbi bi und Trummle findi s'töllscht wos git
Matteo Logo	Ich ha scho immer welle trummle!	Hot dog oder Pizza	Waggis	Fasnacht find ich eifach toll.
Theodor Ehrenbold	Well ich s cool gfunde ha am Informationsoobe und well ich d Frau Siegrist kenn.	Spaghetti Bolognese oder Burger mit Pommes	Waggis!	Ich freu mi uf d Fasnacht und ich freu mi druf, wenni denne ka mitdrummle!
Flurin Fischer	Well ich scho lang möcht drummle und Fasnacht mache, und jetzt ändlig 7 worde bi.	Spaghetti Bolognese	E Waggis	I freu mi scho uf d'Glacé Pause Ändi Juni 😊
Mael Gysin	Will ich aktiv a dr Fasnacht will mitmache.	Hörnli Ghacks	Waggis	Nüt
Ben Hartmann	Well d Nuna und s Mami mi defür begeisteret hen	Hot Dog und Spaghetti	Ueli	Möcht s negschtmol besser mitmache 😊

Nochwuggs / ...und no me Vorstellige vo de Junge

	Worum bisch bi de Rolli?	Was hättisch gärn an dr Fasnacht zum z'Nacht?	Welles Gosdym hättisch emol gärn an dr Fasnacht?	Was willsch sunscht no sage?
 <p>Jorin Meyer</p>	Wil mi Gotti und ihre Brueder bi de Rolli sinn und ich gärn drummlerne möcht	Omelette und Frücht	E Hirschgostym	D Rolli sinn e cooli Clique
 <p>Lilly Simek</p>	Will d'Aliya in dr Clique isch und mich a de Fasnacht näterwis mitgnohet und ich vo de Rolli mega nätt ufgno worde bi	Risotto mit Steipilz	Neon pinki Blätzlibajass mit gäle Badeente uf em Kopf und uf de Schultere. Sött die Auge richtig weh due	D'Lüt woni bis jetzt troffe han sind mega nätt 🤔
 <p>Nora Delay</p>	Mi Mami isch im Stamm, mi Grossmami in dr Alte Garde und 2 Schweschtere in dr Junge Garde	Sushi wär super	Y wär gärn mol e Katz an dr Fasnacht	S'Drummler gfallt mr sehr!
 <p>Valentin Gasser</p>	Will mini Schwöstere und mi Mami au bi de Rolli sin.	Omelette	Waggis	Nüd 🤔

Laaferi 2023

Mir hän nach lange Vorbereitigszyt und vyyl Yiebe am Donnstig bi dr Stellprob s'erste Mol uf dr Bühni dörfe stoh. Gspielt hän mir nonig wirklig, es isch vorallem drum gange z'luege wo meh stoht und wie mirs am beste bi de Übergäng mache. Mir häne e baar Awisige bekoh und unseri ganze Gostüm abglade.



Frytig Hauptprob/Premiere

Am Frytig hän mir unseri Hauptprob ka, mir hän uns voller Vorfreud am zwei vor em Igang troffe, nur Dambuure wo Dagwacht gspielt hän, sin scho friener dört gseh. Mir sin alli zämme ufegange und hän uns schnell miesse ispiele. Es isch immer e kli e Stress gseh, Nachem Ispiele hän mir uns umzoge und sobald Dambuure zruck ko sin vo ihrem Uftritt hän mir uns langsam miesse barat mache. Mir sin alli zämme abe zu dr Bühni glofe und hän unsere Uftritt sehr guet uf d'Bühni brocht. D'Hauptprob isch scho fast wie die richtigi Ufführig gseh, es hän sogar Lüt zuegluegt. Jetzt hän mir e grossi Pause ka will de nächsti Uftritt isch denn erst d'Premiere gseh am Obe. E baar hän d'Pause gnutzt zum e kli früschi Luft go schnappe, e baar hän dinne uf de Stüehl chillt, anderi hän Fuessball gspiet, nomol anderi Battmington und e baar sin zu Fründe vo andere Junge Garde gange. Am halb 8i het d'Premiere agfange. Mir hän uns natürlig vorhär wider igspielt und uns umzoge. Wo alli barat gseh sin, sin mir abe zu dr Bühni und hän e tolle Uftritt ka. Nachem Uftritt hän mir zimlige miesse pressiere, will e baar zum Fasnachtsbändeli hän miesse. Die andere sin dört bliebe und hän no d'Schlussnummere gmacht.

Nochwuggs / Laaferi / Teil 2

Samstig Nomidag und Obevorstellig

Mir hän uns wider am 2i troffe und sin uns eimol meh e kli im Stress go Ispiele. Nachem Ispiele hän mir uns umzoge und no kli könne Pause mache. Sobald Dambuure zruck ko sin, hän mir uns langsam miesse parat mache und sin denn abe zu dr Bühni. Au am Samstig hän mir e sehr coole Uftritt ka. Jetzt hän mir nomol e grossi Pause ka und au am Samstig het jede d'Pause unetrschiedlich gnutz. Es het no z'Vieri gäh und d'Stimmig isch mega toll gseh. Irgendwenn hets denn wieder parat mache gheisse und mir hän unseri Morgestraich Gostüm azoge. Wo alli parat gseh sin, sin mir alli zämme abe und hän e richtig tolli Schlussnummere mit allne andere Junge Garde ka. Jetzt hets wider Pause gheisse und au dasmol het sie jede kli uf e anderi Art gnutzt aber egal wie meh sie gnutzt het, eins stoht fest: jede het Spass ka. Irgendwenn hän mir uns denn wieder miesse parat mache und es isch dr glych Ablauf wie immer gseh. Nachem Uftritt hän e baar nomol ganz im Stress zum Fasnachtsbändeli miesse und die andere hän d'Schlussnummere gmacht.

Sunntig Derniere

Am Sunntig het langsam jede de Ablauf uswändig könne und so hän mir alli nümm so e Stress ka. Näbe de tolle Uftritt hän mir wider vyyl pause ka und vyyl Zyt neuu Lüt kennezlerne oder Zyt mit däne z'vebringe wo meh scho kennt. Mit de Schlussnummere isch s'Laaferi fertig gseh, e baar hän no gholfte ufrume und sin no kli dört bliebe. Alles in allem isch es e mega tolls Wucheend gseh und mir hän vyyli Erfahriga gsammet. Es het ungläublig vyyl Spass gmacht und mir würdes jeder Zyt wider mache.

-Shania und Anja



Nochwuggs / Fasnachtsbändeli

Fasnachtsbändeli 2023

Am Fasnachtsbändeli sind wir an sechs Abenden aufgetreten. Wir haben den «Voilà» und den «Links Churz» gemacht. Letztes Jahr sind wir auch aufgetreten, aber nicht als Clique, sondern als private Gruppe, also ohne Pfeiffer. Dieses Jahr sind wir als Basler Rolli Junge Garde aufgetreten. Die Pfeiffer haben beim «Voilà» gepfiffen und beim «Links Churz» mussten sie eine Choreo mit Fahnen dazu machen, wie am «ESAF». Dieser Marsch wurde dort uraufgeführt.

Das Thema des diesjährigen Fasnachtsbändeli war das Eidgenössische Schwing- und Älplerfest in Pratteln. Es war immer eine lustige Zeit, in der wir uns als Dank mit einem Essens-Bon etwas kleines zu Essen und Trinken holen durften. Nach dem ersten Auftritt mussten wir schnell zurück ins Pfadiheim, in dem wir uns einspielen und unsere Sachen deponieren konnten, denn wir hatten bald unseren zweiten Auftritt. Um uns auf diesen Auftritt vorzubereiten, mussten wir uns umziehen und den Ablauf nochmals anschauen. Zwischen dem zweiten Auftritt und der Schlussnummer hatten wir eine lange Pause, in der wir Spiele gespielt haben. Bei der Schlussnummer durften wir uns verbeugen und beim Fasnachtsbändeli-Lied mitsingen.



Neve Kirmess



Nochwuggs / Fasnacht 2023



D Fasnachtsvorfreud hett mit em Laterneypfiffe agfange. Ich bi langsam nervös worde und bim parat mache vo de Goschdym isch d Vorfreud no meh gstiege. In de Nacht uf de Morgestraich hani fast nid chönne schlofe und ha mich umso mehr gfreut, wo de Wecker glüte hett. Natürlich isch me nach em Morgesträich müed, aber freut sich umso meh uf de Nommitag und die witere zwei Dääg. Ich has super gfunde, dass nach Corona endlich mol wieder e Fasnacht stattgfunde hett, mit eme normale Cortège. Es isch sehr toll, wenn meh sis Goschdym am Cortège allne Zuschauer präsentiere kha. Usserdäm hämmer alli unseri neue Märsch an de Fasnacht chönne präsentiere, wo mir fliessig defür güebt hänn s ganze Johr lang. S Zämmesi mit de Clique isch immer sehr schön und dass mir junge Rolli au zwüsche dure mit em Stamm oder au mit de Alte Garde laufe find ich sehr toll. Leider isch d Fasnacht das Johr sehr chalt gseh und d Sunne hett ebiz gfählt. Trotzdem hänn mir d Fasnacht chönne gniesse. D Zit vo de drei Dääg goht leider immer z'schnäll verbie, aber ich freu mich jetzt scho uf die nögsti Fasnacht 😊

Lisa H.



Dr Bummel vode junge Rolli 2023

Es isch schwierig nach all däne Johre Jungi Rolli immerno e spannendi Bummelaktivität z finde, wo Chlii und Gross Spass macht. Doch s wird immer wieder gmeischeret. Dies Johr simmer sogar chli us de Schwiz use und hän in Lörrach dörfe Pfyffe und Drummlle. Wo mir denn noch emene feine Znüni inere Spielhalle acho sin hämmer nid nur chönne Lasertag spiele, sondern hän au in die Blacklight belüchteti Minigolfbahn ihne dörfe. Nochedäm mir öppe siebe mol halbwägs über die nur spärlich belüchtete Stei uf de Minigolfbahn gstolperet sin hämmer d Halle leider scho wieder müesse verloh. Trotz em Räge hän mir ins Resti musiziert, wo mir denne e feins Menü mit Pommes becho hän. Sogar nocheschöpfe het me chönne und s Glace zum Dessert isch so eins gseh wo die Jungi Rolli am Mäntig und Mittwuch Oobe ade Fasnacht sich nur so chönnte erträume. Zrugg im gliebte Basel hämmer vode Zugbegleitig wissi Rolli-Ballön becho. Danke nomol für die!

Wie mirs erwartet händ, het uns au de Räge in Basel nid in Rueh glo und d Hälfti vode Ballön sin durch de schveri Räge fascht am Bode acho. Zum Glück hän jo alli Tambour:inne Schlegel ide Hand gha vo me das Wasser wieder het chönne wägschloh um d Ballön vo däre Lascht befreie. Wie das d Pfyffer glööst hän isch mir persönlig e Rätsel;)



Nochwuggs / Bummel / Teil 2




Dr Alte Garde isch dä Räge au unsympathisch cho und darum hämmer leider unser gmeinsams Ründeli müesse absage. Die alt Garde im Warme und mir hän e extra lange MacDonaldis Halt becho.

Obwohl de licht grüentscheligi Rägesaft nurno so vom Drummelfäll tropft isch und s Piccolo vor lutter Räge einem fascht us de Hand grutscht isch, ischs mit däre tolle junge Rolli natürlich gliich e tuusig mol schönere Oobe gsie, als es jeglichi Aktivität ohni die jungi Rolli im Trockene gseh wär. Danke an alli Verantwortliche für dä tolli Rolli-Bummel-Hit!

Aliya



Kommissär Rolli Basler und die gstooleni Drummle



Dr Andri het ganz roti Bagge vor Ufregig. Ändlig isch die fasnachtslosi Phase verbi und hüt Obe startet wieder s'Drummle vo dr Junge Garde bi de Basler Rolli. Plötzlich fahrt e Dieb mit eme rote Velo am Andri verbi und risst ihm d'Drummle vo dr Schultere. Ganz ufglöst springt dr Andri uf dr nächst Polizeiposchte und trifft dört uf dr Kommissär Rolli Basler. Er ka dr Andri schnäll beruhige und verspricht ihm, dass er dr Dieb und dodrmit sini Drummle finde wird.

Scho am nächste Daag ka dr Kommissär Rolli Basler drei Velos sicherstelle und het dodrmit drei Verdächtigi. Alli Verdächtigi stritte ab, dr Dieb z'sy. Aber wäm ghört denn jetzt das rote Velo, mit däm dr Raubüberfall gmacht worde isch und wär isch dr Täter?

Kasch du em Kommissär Rolli Basler hälfe? Füll drzue am Beschte die unteri Tabälle us und überfieh dr Dieb:

	Verdächtig Nr. 1	Verdächtig Nr. 2	Verdächtig Nr. 3
Name:			
Art vom Velo:			
Farb vom Velo:			

Nochwuggs / Quiz / Teil 2

Do sind d'Hiwiis:

1. Eine vo de Verdächtige heisst Dennis.
2. E andere Verdächtige fahrt e Rennvelo.
3. Rechts näbem Rennvelo stoht e Klappvelo.
4. Ganz links in dr Tabälle stoht e Mountainbike.
5. S'Mountainbike isch nit grien.
6. Grien isch s'Klappverlo vom Michael.
7. Dr Uwe stoot als Verdächtige in dr Mitti vo dr Tabälle.
8. Dr Dennis fahrt e gäals Velo.

Wär het am Andri sini Drummle gstoole?

D'Lösig findsch uf dr Sitte **xy**.

crome.ch

Ab **U**ff
d'Gass!

Immer unterwegs für Sie.
www.unternaehrer-ag.ch

Unternährer
Unser Elektroprofi

DUESCH IM VOILA INSERIERE - DUET DI GSCHÄFT RASANT FLORIERE!

Voilà	Cliqueheftli vo de Basler Rolli		
Erschynigsturnus	3-4 Mol im Johr		
Ufflaag	rund 300 Exemplar		
Bryse	1 Syte	1 Ussgoob	90.- Frangge
	1 Syte	4 Ussgoobe	270.- Frangge
	1/2 Syte	1 Ussgoob	50.- Frangge
	1/2 Syte	4 Ussgoobe	150.- Frangge
	1/4 Syte	1 Ussgoob	30.- Frangge
	1/4 Syte	4 Ussgoobe	90.- Frangge
Druggvorlaag	Grafikdatei Gröss maximal 10 x 15 cm Dateiformat TIFF oder .png oder .jpg oder .pdf Ufflössig mindestens 200 dpi		

Mir dangge ganz hätzlig für Ihri Unterstützig!

Basler Rolli

Basel, im Januar 2023



optik
schneider

Optik Schneider AG
4009 Basel
Spalenring 15
Tel +41 61 381 91 91
optik-schneider-basel.ch



musik **oesch** basel
DAS FACHGESCHÄFT FÜR BLASINSTRUMENTE

Spalenvorstadt 27 • 4051 Basel • 061 261 82 03

Rolli unterwäggs / Charivari Februar 2023

Wenn zoobe uff dr Bühni stosch
In drei verschiidene Goschdym gosch
Denn weisch, es isch sowyt
's isch Rolli Charivari Zyt

Windgschützt zwüsche Glöön
Wo in dr Gass so ummestöön
Gniese mir – e Bier in dr Hand
s Charivari mitenand

D Ramona, die hets voll im Griff
Fiehrt jede Oobe s Pfyfferschiff
Weiss ich nit, wo ass ich stand
Nimmts mi eifach an dr Hand
Und fiehrt mi an mis Plätzli – ganz charmant

Bim Znacht im Lamm do simmer gsässe
Und hänn druuffaabe d Zyt vergässe
Gseggled simmer d Gass duruff
Zer Dyyre-n-yy und dr Stägge-n-uff
Si stöön uff dr Bühni, scho bereit
Mr hänn ys no schnäll yynegreihet
Erlyychtert, doch usser Atem gfalla
Pfyffe mr denne unsere Voilà



Rolli unterwäggs / Charivari / Teil 2

's isch Pause, jetzt kunnt s Büüsi dra
Ich leg d Hoose, Kutte und au d Stulpe-n-aa
Doch heiterefahne, wie ka das syy?
Ich pass nümm in dr Gürtel dryy
Zäh Zentimeter fähle dra
So vvyll Bier hann ich nit drungge kha
D Ramona klärt mi frindlig uff
Im Goschdym stoot doch d "Jessi" druff
('s sig d Gürtel vo dr Tochter gsi
Dorum isch är au vvyll z kurz für mi)

Eso isch sicher no meh passiert
Die falschi Larve mit sich gfiehrt
Sitzebliibe in der Beiz
S Yysebähnli het au si Reiz

Mir könne nit nur drummle, pfyffe
mir dien au d Gläägeheit ergryffe
dien Blöögge wie verruggd
schreye wenn das Baby druggd
D Gryysel sinn au nit verwääge
Spände uns e Gryysel Sääge
Singe dörfe mr leider nit
Das miecht dr Eric gar nit mit



Rolli unterwäggs / Charivari Teil 3

Am Schluss vo jedem Oobe
Danze d Abba uff dr Bühni doobe
Zämme mit Katze und au Glöön
Wo au uff dr Bühni stöön

S ändet bim gmiedlig Zämmesyy
Bi Bier, Gin Tonic und au Wyy
Leider nit im Sancho Pancho
Dä git's ebbe nümm eso
Kasch aber au im Fojjee
Mänggi fröhligi Gsichter gsee

S Charivari isch vrbyy
Doch s Drummeli kunnt jo au scho glyy

Les Bleues



Rolli unterwäggs / Impressione vom Charivari



© Benno Hunziker



© Benno Hunziker


Rolli unterwäggs / Impressione vom Charivari



REPROLINE

DAS PRINTCENTER IM GUNDELI / BASEL

**Wir drucken nicht nur
Cliquenbroschüren!**



Bruderholzstrasse 40
4053 Basel
061 366 99 99
info@reproline.ch
www.reproline.ch

Rolli unterwäggs / Fasnacht

Die Fasnacht 2023 – ein kurzer Rückblick.

Da standen wir also um 4 Uhr am gewohnten Ort vor dem New Yorker an der *Freie Strasse* und warten gespannt, was da kommen mag. Endlich wieder mal eine 'normale' Fasnacht. Oder doch nicht? Ganz speziell nahmen wir die Stimmung kurz vor dem Startschuss wahr. Es war still, totenstill. Ehrfürchtig. Wir können uns nicht erinnern, einen solchen Moment schon mal wahrgenommen zu haben. Kein Zuschauer hat ein 'Müggchen' von sich gegeben. Alle hielten die Luft an und jeder hielt den Latz, oha Lätz! So laut und deutlich hörten wir das 'Moorgestraich vorwärts Marsch' von Marcus noch nie. Sau schön war's! Gänsehautmoment. Auf das Austauschen dieser Wahrnehmung mussten wir dann geduldig warten bis zum ersten Halt in der 8-Bar. Aber das erste Ründeli war herrlich. Bei den frischen Temperaturen zog es alle relativ zügig ins Warme zu Mähsuppe, Hopfewähie und dergleichen. Immer ein komfortabler, gemütlicher erster Halt. Wieder zurück im Grossbasel war gut spürbar, dass es deutlich mehr Besucher in den Baizen hatte als auch schon. Die getrennten Ründli waren wie immer ein Highlight am Morgestraich. Voll motiviert ging es ab in die Berge: Gämsbärg, Heubärg, Spalebärg, niemand liess sich anmerken, dass die Luft dort oben sau dünn wurde 🤔.. In der Hasenburg gabs dann ein finales Bierli mit grosser Bewunderung für den One-Man-Mini-Bautrup, der mit seinem Schlagbohr-Akku in der ganzen Baiz munter und lautstark frohe Botschaften in die Lamperie (Lambries) reinbohrte, MAXIMUM!

Der spätere Abmarsch bzw. Einstieg in den Montags-Cortège hat allen gut getan und wird hoffentlich so beibehalten.



Munter zog die blaue Meute ihre Etappen auf dem Cortège. Die 'Abkürzung', quasi direkt zum Hahn, war eine gute Sache. Dann, der übliche Sprint in das 1.OG im Kongresszentrum, jeder will SEINEN Platz ergattern und wie jedes Jahr hat es erstaunlicherweise wieder einmal Platz für Alle... Schon sind die GT's, Cüpli und Aperollis bestellt, bevor wir uns die Bäuche vollschlagen.

Rolli unterwäggs / Fasnacht / Teil 2



Das Aufraffen nach dem Essen gestaltet sich etwas harzig, aber mit der Freude auf die schnelle Runde ist die Anfangsmüdigkeit rasch aus den Knochen. Verstärkt mit der AG, welche wir vor dem Schmalen Wurf aufgeben, geht's zurück ins Grossbasel. Die Zeit vergeht wie im Fluge und um ca. 2.00h war dann die Luft definitiv draussen. Am Dienstag wie immer Alle in alle Richtungen verstreut. Hier einmal ein Rolli, da einmal ein Rolli. Alle geniessen es, so machts zumindest den Anschein. Der Einstieg in den Cortège am Mittwoch war harzig, vielleicht müsste man hier auch z.B. 2 Std. später starten 🤔 item irgendwann war der Marathon vom Wettsteinplatz auf den Barfi beendet und der Durst kannte keine Grenzen. Das Schafgässlein war infolge Baustelle nur reduziert begehbar und so schafften wir es mit einer kleinen Planänderung ins Volkshaus, von wo aus wir mit der JG weiterzogen und wiederum das Kongresszentrum stürmten, same procedure as every time! Monstermässig stellten wir uns dann mit der AG und der JG um ca. 22.00h vor dem Stadtkeller auf und bewegten uns zum überaus beliebten Gotte-Götti halt beim Lantini. Trotz Riesengewusel finden alle ihre Kinder bzw. auch umgekehrt. Dieser Kurztreff mit nachhaltiger Wirkung für die 'Jungen' ist immer wieder erstaunlich. Wird man doch nach Jahren als Gotte oder Göttli von einem Sprössling wieder erkannt und muss dann konsterniert feststellen, dass man die Begegnung von damals nicht mehr soooo präsent hat...

Rolli unterwäggs / Fasnacht / Teil 3

Und weiter geht's mit der Escorte der JG zu ihrem Endstraich bei der Harmonie. Strammstehen und den Spalenbärg dicht machen ist angesagt. So kommt die JG zu ihrem würdigen Endstraich. Es verbleichen noch knapp 4 Stunden, um uns noch auszutoben oder das noch rauszulassen was noch übrig ist. Für mich war es eine Hammer-Fasnacht. Alles hat gepasst. Ein grosser Dank an alle, die dazu beigetragen haben, dass wir eine so tolle Fasnacht miteinander erleben durften.

Dömse





GUTZWILLER
GARTENBAU

Walter Gutzwiller GmbH
Drosselstrasse 21 | 4106 Therwil
Tel. 061 721 37 88
www.gutzwiller-gmbh.ch

BISCH AU SCHO BLAU-Bummel 2023 us Sicht vo ere Vorträblere

Uf dr Yylaadig zum diesjöörige Bummel isch gstande, dass me doch em Sujet entsprächend öbbis blaus sölli aazieh. Das heisst, die persönlige Bummelplanig het, emel bi mir, scho chli friehner gstartet, da mit dere Ufforderig vermuettlig weder blai Jeans no BHs gmeint wärde sy. Das isch doch moll e wunderbari Usred, zum e paar Momäntli bi Zalando zsurfe und öbbis passends zsueche.

Offizielli Besammlig isch am Sunntig am halber elfi im Restaurant Hahn gsi. Aber es wär nit dr Rolli-Vortrag, wenn nit au dä spooti Träffpunkt für e kleine Apéro gnutzt wurd. Mir hän uns also bereits am viertel ab nüüni am Morge bi dr Filo zur Bummelstubete troffe. Damits näbem Prosecco no es kleins Bödeli ka gäh, han ich mine wunderbare Vortragsgspöönli sälbergmacht Gipfeli mitbrocht. Unseri Beautylady Olivia het allne nomoll blai Wimperli montiert und so sind mir grüschtet und gwappnet samt Huet zum Hahn ufbroche.

Lut isch es gsi im Hahn. D Rolli löhn sich doch nit eifach eso uf zwei Stockwärk verteile. 😊 Lieber sitzt me äng und kuschelig an de Tisch und schichtet alli in dr Schankruum yne. Numme zwei Pfyfferdame hän sich für ruhigeri Gspröch in erschte Stock zrugzooge.



Wo denn plötzlich d Männer vo Caro und Fabienne uftaucht sind, bin ich definitiv froh um unser Gipfelibödeli gsi (es isch generell bekannt, dass ich mi nach eim Gin Tonic scho fescht an de Chipsli muess hebe...).

Rolli unterwäggs / Bummel / Teil 2

Jedefalls hän uns die beide Herre vo Basilisk Gin e wunderbari Degustation vorbereitet. Si hän ihre traditionelle Basilisk Basel Dry Gin derbi ka und zuesätzlich dr pryyskrönti Old Tom Gin und e feine Ginlikör. S ganzi isch natürlig mit de richtige Früchtli, Gwürzli und Fever Trees verköstigt worde. Viele hänzlige Dank für die feini Uswahl!



F U S S P F L E G E



Carmen Petralli
Dipl. Fusspflegerin

Sternengasse 6
4051 Basel
079 768 04 23
fusspflege.cp@bluewin.ch

Rolli unterwäggs / Bummel / Teil 3

Aaschliessend sind mir direkt vor em Huus vom Tram abholt und zum Barfi chauffiert worde. Au die paar Minütli im Tram sind sehr unterhaltsam gsi, hän doch die wahnsinnig scharfe Kurve vo de Gleis zu dr eint oder andere (hoppla) Umarmig gfiehrt.

Ich hät jo dermit grächnet, dass mir entsprächend em Sujet ins Hotel Rochat göhn go ässe, aber s OK het Gott sei Dank mit dr Kunschthalle e besseri Lösig gfunde. Was soll i do verzelle? S Ässe isch sehr fein gsi, d Gspröch intensiv... Bi de Rolli herrscht chli Umbruchsstimmig und das isch mir persönlig vor allem in dene paar Stund in dr Kunschthalle ufgfalle und au das nit erscht mit dr Aasproch vom Presi Dominic. Ich glaub, es kunnt e spannendi Zyt uf uns zue und ich wünsch uns sehr, dass mir derbi nie vergässe: Alli für eine – eine für alli!



Denn het die inneri Uhr alli langsam unruhig wärde lo: Es isch bald vieri und mir dörfe uuse go drumme und pfyffe und go Rolli sy! Au do hän mir vom Vortrab natürlig no kurz e kleine Apéro yyplant, zum dr Luzian und dr Jonas mit chli Berliner Luft in unseri Reihe ufznäh! Bim Ablaufe isch wohrschlinig nit numme unseri Zugschefin, d Filo, chli nervös gsi. Was erwartet uns am Barfi? Isch sich jetzt wirklich die Demo dört am Formiere? D KaPo BS isch uf jede Fall sehr presänt gsi und het derfür gsorgt, dass alli Fasnächtler (absolut genderneutral) ihre Bummel hän könne gniesse.

Rolli unterwäggs / Bummel / Teil 4

Und so sind mir bis kurz vor em elfi zNacht durch d Gasse vo Basel bummlet. Mir hän no zuesätzligi Verstärkig vo dr Saskia, dr Aliya und em Moritz us dr Junge Garde beko. (Das sind jo die reinschte Duracell-Hääsli!) Gege dr Schluss sind Tamboure übermüetig worde und hän e Meuterei aazettlet. Plötzlich hän sie dr Zug links und rächts überholt, dr Habi-Major isch zmitts im Vortrab gloffe, Pfyffer und Tamboure völlig durchmischet. Und alli sind happy gsi!

I däm Momänt isch es völlig egal gsi, ob dr Klettverschluss am Goschdym blau gsi isch, wer s Goschdym am Charivari offe ka het, wer wieviel Prozänt in dr Üebig gsi isch oder wer jetzt am Bummel Jeans aaka het. In däm Momänt sind mir eifach Rolli gsi!

E grosses Danke ans OK für dä eifachi und gmietligi Bummel!
Danke an d Zugschefin Filo, für die schöne Ründeli!
Danke an Habi, für nur ei Moll Feschtspiil 🤪 und die akkuratig Planig, dass die musikalische Highlights genau in de richtige Gasse kömme!
Danke an alli! Es isch mir e Ehr gsi, dass ich an dr Fasnacht und am Bummel nomoll wie e Satelit mini Runde um Euch ha dörfe dreihe!

#ewigiRolli

Melanie



Swiss Mega Pargg

Ussflugs-Tipp



In Fränggedorf gits e Pargg wo öpis für die ganzi Familie drby isch:
dr Swiss Mega Pargg.

Do gits e Spielparadies vo dr bsundere Art mit Rutsche, Rätsle, Hüpfle,
Klättere, Fühle und Erläbe.

E Riesetrampolin mit 20 Sprungfläche gits zum Ummegegumpe und Um-
metobe.

Über 32 aspruchsvolli Statione kamme e Klätterpargg absolviere.

Me ka au Schutte, Badminton, Squash oder Outdoor-Padel-Tennis spie-
le.

Ganz luschtig stelli mir Bubble-Soccer vor! Do steggt jede Spieler
innere grosse ‚Bubble‘ und bubbled übers Soccer-Fäld.



Die gnaue Informatione au für d'Reservatione findisch uff:
swissmegapark.ch

Adie miteinander!!

«Geschätzte Leserin, lieber Leser» - Mit diesen Worten durfte ich euch in den vergangenen zehn Jahren in 38 Ausgaben jeweils begrüßen. Ich konnte euch informieren über Aktivitäten und das Cliquenleben. Zum Teil über Spannendes, Lustiges, Unterhaltsames, Aufregendes und ja – halt auch manchmal über Trauriges.

Ich konnte das im Rahmen einer super kollegialen Redaktion unter der engagierten Leitung von Nadine mit Spass und Freude als kleine Dienstleistung für euch alle erbringen. Dafür bedanke ich mich nicht nur beim Redaktionsteam und bei Nadine, nein auch bei allen Lesern und Leserinnen die offensichtlich mit Gefallen und Freude meine Zeilen zur Kenntnis genommen haben. Merci!!

Und doch musste ich feststellen, dass es mir nach dieser langen Zeit immer schwieriger gefallen ist, Berichte und Beiträge abwechslungsreich, kreativ und neu zu gestalten. Ein Anspruch den ich mir immer selber gestellt habe. Und so war es eine logische Konsequenz, einen Nachfolger, eine Nachfolgerin per GV zu suchen.

Es hat mich riesig gefreut, dass Aernscht Heitz ohne langes Zögern sich zur Verfügung gestellt hat. Ich wünsche ihm viel Erfolg und die gleiche Befriedigung wie ich sie erleben durfte.

Merci Aernscht und viel Spass und Erfolg!!

Sali zämme...

Wo dr Thomas, nach 10 engaschierte Joor als Voilà-Redaggtter für die Alti Garde sy Amt an beriehmte Naagel ghängt het, ha-n-ych emool schüüch aagfroggt, ob y das Mandat soll/dörf übernää.



Voilà ...doo bi-n-y: My Namme isch Aernscht Heitz, die meischte vo euch kenne my und sunscht find'sch im Voilà Nr. 30 uf dr Syte 22 e ganzsytigi Vorschtellig. Soodeli, und jetz hän der's au scho gmerggt, dr neu Redaggtter schrybt wie-n-em dr Schnaabel gwaggse-n-isch: **Baseldütsch** und nit «rain`s Baseldytsh».

Es freut my, as ych usgrächnet in däm Juubeljoor vo dr Alte Garde euch uf däm Wääg begriesse darf.

E guete Start

Scho in dr erschte Wuche im 2023 sin d Aggktivitäté loos gange. Dr Uftaggt het dr gmeinsami lebigsdaag im Huus vo dr «Knaben- und Mädchenmusik» an dr Utegass gmacht mit eme gemeinsame Midaagässe im «Wurf».



...und Zoobe isch me denn zem Huus «zum Fälkli» an Stapfelbärg dipplet. Dört in dr Zumftstuube vo dr Schluurbeglopfer - äxgyysi - vo de Schuemacher, het ys s`Juubel OK e wunderbare «Apéro riche» offeriert. **Härzlige Dangg!**

Aafang Februar sin mir ze unsere zwei Marschiebige gschtartet. Wie allewyl isch die Erschti vo dr Dreyrooseaalaag em Ryy no durab, bis in Seemannskäller gange, wo mer zem Spaghetti-Ässe yykeert sin.

... und s Ständeli im Pflägg- und Wohnheim St. Christopherus in Glai-

hynige, wo mer mit eme schöne Apéro verwöönt worde sin, het dr Uftaggt gmacht zer zweite Marschiebig, em Ryy no duruff, bis zer Klaus vom Wasserfahrverein Horburg am Undere Ryywääg, zem jöölige Wurschtsalatbuffet.



«Mimi und die Wunderlampe»

Wie allewyyl isch am Frytig vor dr Fasnacht die tradizionelli Ladärnevernissage vo dr Alte Garde im Käller vo dr Spale-Glygge gsi. Nach dr Begriessig vom Obmaa hän mir - zytgemääs via Biimer - unseri Ladärne könne bestuune:

**E richtig schööni,
handgmoolti
Juubeljoor-Lambe!**

Liebi Mimi, das isch
e groosse Wurf,
härzlige Dangg!

...dorum, bassend zem Sujet:
«Mimi und die Wunderlampe»



Genau so härzlig bedangge mir uns bi allne, wo derzue byydreit hänn, das das wiider e glungeni Ladärnevernissage worde isch: Em Zeedeldichter, wo uns sy Wärgg au grad no sälber vorglääse het, em «Spitzige Ryssblei», wo uns eimool mee mit sym tolle Bangg unterhalte het, em OK für d'Organisazion vo däm Oobe und vom Ässe ...und au all dääne, wo drfür gsorgt hän, as s Dessertbuffet so rrychhaltig worde-n-isch.

Am Sunntig...

...hän mir uns scho wiider droffe. Zerscht bi dr Sonja und em Fons im Garte, zem scho dradizionelle Vor-Apéro. Das groosszügigi Aagebot wüsse mir z`schetze. Danggschöön vuylmool!

...und dernoo drifft sich die ganzi Rolli-Familie uf em Münschterblatz zem Ladärne-Yypfyffe. Nach dr Aasprooch vo dr Obfrau und de Obmänner isch dr Hiehnerhut-Momänt do. Die vereinigte Rolli-Pfyffer*inne hän die drey Ladärne harmonisch d`Stadt durab begleitet. Und denn no aimool kurz schloofe...

Vor de Dreien us der Klappe. Gschwind e Kaffi, will`s di friert, und e Cognac fir dr Bappe! Heggschti Zyt, `s wird abmarschirt. Ibernächtigt bisch und blaiich... **Ändlig wider Morgestraich!** Blasius

Em Peter sy erschti Fasnacht

Dasch kei Hyylgschicht vom Meier III, dasch em Peter Moser sy Gschicht

S'isch 10 vor Vieri und y schtand mit kalte und zittrige Händ in dr Freye. Ych schpiil sit 3½ Joor Piccolo und ha in de letschte Möönet giebt wie verruggt. Jetz bin-y blötzig nimm sicher, ob y no weiss, wie dr Moorgestraich goot. S'isch schliesslig my allererschti Fasnacht als aggtiive Fasnächtler; und nai, ych bi nit in dr Junge Garde, sondern in dr Alte. Nur im Bezug uff s'Repertoire bin-y no zimlig jung.

Noch eme Schtau uff em Määrtplatz erlääb-y s'erschti Mool, wie-n-e saukalti Byyse d'Döön vo mym Piccolo richtig Village-Neuf dervoo bloost, und no nie ha-n-y mii soo gfreut uff e haissi Määlsuppe wie jetz dääne im Glaibasel.

Am Määntig-Zoobe bin-y richtig duure; ych bi jo nit grad als Früe-Uffschteher bekannt. S'näggschd Joor muess ych mir glaub aifach saage: Y gang am Moorgestraich schpoot ins Bett, anschtatt: Y muess frie uffschtoo.

Vyyl Reschpäggt ha-n-y ghaa vor em Rolli-Tämpo; drum bi-n-y froh, ass bi dr Alte Garde am Spaalebäärg us «zaggig» denn mänggmool «gmietlig» wird und d'Triller e bitzli kürzer ussfalle.



Damit ych die Alti Garde vor em Comité und andere Koryphäe mit mym beschränggte Können nit blamier, wäggsle-n-ych jewyyls in Vortrab. Denn pfiif-y aifach ohni Piccolo lyyslig vor mii aane. Au die Erfaarig wött-y nit misse, sy het mer e neuu Sicht uff dä wichtigi Dail vo dr Glygge gää. Dangge liebe Emme & Co, dass ihr mii so nätt yybezooge häänd.

my erschti fasnacht

Schtolz bin-y uff dä ganzi schyggi, farbefrohi Zug und uff die gross-artigi Ladäärne, wo no richtig vo Hand und Pinsel gmoolt isch. Z'erscht bin-y nit so glügglig gsii mit däm Schtärnli und de inne. Aber dr erschti Värs vom Zeedel het my grad wiider besänftigt, und die letschti Ziile isch ganz in mym Sinn und Gaischt: «... mir machen ys nidd fir jede Saich zem Aff».

Genau esoo ha-n-y mir daas bi de Rolli vorgschteilt: vyyl Witz und Kreativiteet.



Und als Döpfli uff em i het jo mii Laarve öbbe die glyyche Runzle bikoo wie my wirgglig Gsicht – chapeau!

Zem Schluss e grosses Danggschön an d'Pffierchefin, d'Inschdruggtorin und an alli andere vo dr AG, wo mii e Joor lang ermunteret, unterschützt und so hätzlig uffgnoo hänn.

Peter

Am Zyschtig...

Am Fasnachts-Zyschtig het uns dr Stamm in Ohregribler-Käller entfiert und mit ere Rolli-Jubel-Daarte überrascht!

Hätzlige Dang



Ych ha`s e ganz tolli Fasnacht gfunde. Es macht eifach mega Spass mit euch. E tolli alti Garde.

Stefanie Bähler

per WhatsApp am 02.03.23



**Mir het dr Bummel als
Altgardischtin gfallt.
S'isch mer wool bi euch.**

Annina per WhatsApp am 20.03.23

Camel Trophy Boule Turnier

E Bummel-Bricht vom Obmaa, frey übersetzt in`s Baseldütsch

Wenn`s Juubel OK, Andy und Emme, losgloo wärde, git`s e Juubel-Bummel, wo syynesglyche suecht. Wägem unsichere Wätter, isch der Bummel am 19. März uf em Münsterplatz leider mit eme abgeschpäggtt Camel Trophy Boule Turnier g`startet. Gwunne hän Alli wo mitgeschpiilt hän. Nach eme Fuessmarsch über die Mittleri Brugg sin mir im Merian Saal vom Hotel Merian fürschtlig bedient und verwöönt worde. S Unterhaltigsprogramm isch g`schbiggt gsi mit ere Buuchdänzerin, ere Video-Gruessbotschaft vo vyyle Prominänte us Sport, Politik und Fasnacht, und dr Serwierdochter «Amalie», e Parodie (vom René C. us A.), wo em ganze d`Groone ufgsetzt het.

Am halb Fümfi isch`s denn definitiv losgange, mer sin uff d`Gass. Nach ere gleine Runde, mit eme Halt vor em Schoofegg, sin mir ins Grossbasel gässlet. Nach dääre Runde isch dr «grossi Rääge» ko. Uf das het dr Emme sehr guet reagiert und alli per «Alti Garde-Tschädd» informiert, as d` Abmarschzyt verschoober wird, bis s Wätter wieder trogge isch. Nach dääre Zwangspause hämmer unsere Bummel no bis kurz vor em Elfi zelebriert.



E grosses Danggschöön em Bummel-alias Juubel-OK für dä heerlig Bummel.
Schilby

Nachwort...

...vom abtretenden AG-Redaktor Thomas Wyss

Ich habe meine Rolle als Redaktor auch immer wieder dahingehend interpretiert, das Cliquenleben und einzelne Vorgänge kritisch zu hinterfragen oder zu kommentieren. Vielleicht sensibilisiert durch die eigene Nachfolgersuche ist mir aufgefallen, dass in fast allen Gruppierungen Neubesetzungen in diversen Ämtern anstehen.

Was mich etwas bedrückt ist die Tatsache wie wenige Mitglieder sich heute spontan bereit erklären, ein Amt zu übernehmen. Man ist zwar stolzes Vereinsmitglied, aber einen Beitrag zum weitem Gelingen will man nicht leisten. Besonders ärgern mich dann jeweils Aussagen wie: ‚ich habe halt Familie‘ oder ‚mit meiner Arbeit geht das nicht‘.

Solche Aussagen sind für mich eine schlichte Beleidigung all jener die Ämter innehatten. Sie waren nicht faul in ihrem Job, lungerten herum oder vernachlässigten ihre Familien. Mit etwas gutem Willen und einer minimalen Organisation können Beruf, Familie, Hobby und ein Amt sehr wohl unter einen Hut gebracht werden. Ja, es braucht halt etwas Mut, sich zu exponieren. Zu riskieren, dass man es nicht immer allen recht machen kann, oder auch dass man scheitern könnte. Aber ohne diese Bereitschaft, den Willen und den Mut wird es über Kurz oder Lang keine Rolli mehr geben.

In diesem Sinne, nur Mut!!!

auf ein wort noch!



Dr Uwe mitem rote Rennvelo hett em Andri sini
Drummle gsthole



Planung schafft Zukunft.


Seit mehr als 125 Jahren steht der Name Rapp für passgenaue Lösungen im Kontext bebauter Umwelt. Als unabhängiges Familienunternehmen fokussieren wir auf die Bedürfnisse unserer Kundinnen und Kunden und entwickeln nachhaltige Konzepte zur zukunftsgerichteten Gestaltung von Lebensräumen.

Wir vereinen vielfältige Qualifikationen unter einem Dach: Spezialistinnen und Spezialisten aus den Bereichen Architektur, Infrastruktur, Energie, Mobilität und Logistik erarbeiten in interdisziplinären Teams intelligente Lösungen aus einer Hand.

Werfen Sie einen Blick: www.rapp.ch

Rapp AG | Hochstrasse 100 | 4018 Basel

Ihr **Wein-** und **Getränke-** **Lieferant**



Theo Rietschi AG
Getränke en gros



Hahn-Rickli AG
Weinkeller

Schwarzes Brätt



Adrässänderige
bitte an
basterrolli@gmail.
com schigge, merci

Näggschti Usgoobe:

-xxxxxxx



xxx